

2 Tesalonika

Tshapita 1

1 Paulo la Silvanu la Timote ele Ekelezia end'asi Tesalonika bale ele Ndjambi, Apha endiso, o la ele Nkumu endiso Yeso Kilisito. 2 Diyota dinda diphepha el'inyo o la wee m'ele Nkumundjeyi, Apha endiso la m'ele Nkumu Yeso Kilisito.

3 Bain'anami, diyadi d'isho yuteya Nkumundjeyi elunga betsho beuma nda boloko oninyo. Djoï dikomana shiko nda ditshina inda yimedya eninyo eyadi diphulaka phala la diyota dininyo diyokaninyo baumela diyadi diphulaka; 4 sheko isho mele tophyapheta nda djoï dininyo nd'atei anda dikelezia dina Nkumundjeyi, djoï inda botshidingano boninyo o la inda yimedya eninyo nd'atei anda elu eninyo la loshilingi loshinginyo. 5 Baoi ane bayadi namba enda phululu enda dilongya ena Ndjambi eninyo, ina inyo yeledyama banto bakoka banda yotshwa nda waphemelo bona Nkumundjeyi; inyo lolena elu nko nda djoï diko. 6 Tokanedya mbo, Diyadi bolotshi Ndjambi dishingya baiko baolokindja elu, 7 o la dilokaya yutsha, inyo la isho, inyo ane bayadi yenaka elu etambene, nda eneyelo ena Nkumu Yeso Kilisito ma loola, la bandjelo banandi bana mpamba, la tsha topheta, inda ditshinanya bane bapheyi Nkumundjeyi, basoko baphimedye bosako bond'olotshi bona Nkumu endiso Yeso Kilisito. 9 Iyo baokena elu enda ephitanelo enda diiyo; baokomamolama ma elongi ena Nkumu la ma ditombya dina mpamba enandi, 10 nda wina boiko boyakalomi andi inda diyophikama nd'atei anda bakilami banandi; la nda dishashimodya bankanyi nd'atei anda baiko baolimedya; (nda ditshina ina inyo lolimedya bosako bokiso alosakolaka) 11 Dika diko toyadi yotshaka betsho beuma ayisho, Ndjambi endiso alelekedya bekokyami benda yeta eninyo, la dikomanya esangedya enandi enda bolotshi la mpamba bya, inda dina ina Nkumu endiso YeYeso Kilisito dimemyami nd'atei aninyo, o la inyo diphekami l'andi shene ekomana nda diyota dinda diphepha dina Ndjambi endiso la Nkumu endiso, Yeso Kilisito.

Tshapita 2

1 Bain'andiso, toloonda nda bolok'onda eyelo ena Nkumu endiso Yeso Kilisito, la esukamelo endiso el'andi mbo, 2 Lotolekolaki diphukyama na mpima eninyo, lotokananaki nkina la diphopho, nkina la lolaka, nkina la bonkanda bondowana la bomodi m'ele isho, ondolosangela mbo, Wina bona Nkumu boshila diyaka. 3 Bonto atolotshuyaki nkula ishishi, la boloko onda wina boiko bophongokoka lako nde botonamelo bokoya

nd'oso, la dwele oko lon'ombe okenyalomi, bona bonda etshwelo, 4 bondoyadi ditonaka baumela; la andi ayadi diyauledyaka nd'adiko anda emba bya etangama mbo, Ndjambi, nkina emba eyadi diphikama; ko andi menge aokulama nd'atei anda etombolelo ena Nkumundjeyi, aokoyasanga ayandi, Emi nko Ndjambi. 5 Inyo lophungi mbo, Akimi nd'atei aninyo, nd'oso ona ntlotshika, ndondoshila dilosangela baoi ane. 6 Ko etambene inyo lokophola mbo, emba eyadi yosukaka ina andi yenama nda ekeki enandi. 7 Djoyi inda wishishi bon'ombe boyadi dikambaka o la nda ekeki ene; aye bosuki boyadi diyosukaka etambene elengi ndi animalomi andi. 8 Nda etamba eiko wungesanyi bokenyalomi, ko Nkumu Yeso aokoophita la bophwe bonda borumvu bonandi, aokootekya la mpamba enda eneyelo enandi. 9 Eyelo ena one eyadi nda iyedi inda bokambelo bonda Satana la baoi bana mpamba bokeledi la bokeledi, la dishile, o la baoi banda diphepha banda bophoto, 10 la batshuya bankumela ban'embe nd'atei anda baiko baolungusana, djoyi inda iyo batambe lolango londa baoi banda soosolo inda iyo yika. 11 Dika diko Nkumundjeyi aokasokola bokambelo bonda bophoto inda iyo yimedya djoyi inda bophoto, 12 la ditshina inda iyo baumela batimedye baoi banda soosolo, aye baoshashala nda baoi ban'embe, inda iyo yumbama boloko.

13 Bain'andiso, nda ditshina dine diyadi la isho yuteya Ndjambi elunga nda boloko oninyo, balangami bana Nkumu mbo, Ndjambi aolosona ma angolelo ina inyo yika ma ekidyamelolo ena Nyuma la yimedya enda lolaka londa soosolo. 14 Andi ondoletaki nda djoyi diko la bosako bondiso bond'olotshi, ina inyo yamba dimemya dina Nkumu endiso, Yeso Kilisito. 15 Sheko, baina banami, lemalaka la bokemba, lambodyaka baoi bakinyo wekyamaka nkina nda botephelo, nkina nda bonkanda m'ele isho. 16 Aye, Nkumu endiso, Yeso Kilisito andi o mele, la Ndjambi Apha ondotolangaki, ondotokaaki lokesedi londa diiyo la dilindedya inda bolotshi ma diyota dinandi: andi asalanganyi betema beninyo, alokembyi la bolimo bond'olotshi bya o la lolaka lond'olotshi bya.

Tshapita 3

1 Djoyi inda esuka, bainabanami, lototshela mbo, Lolaka lona Nkumu lotshangwi la lomemyami, shene ekelama nd'atei aninyo, 2 o la inda isho totshungwe ma bakata ban'anto an'embe la yungusanyi, la boloko onda banto bauma bapha la yimedya. 3 Ayi, Nkumu ayadi la dikotomedya la andi aokolokembya, aokolesanya ma baoi ban'embe. 4 Toyadi la dikutela ele Nkumu nda djoyi dininyo mbo, Inyo loyadi dikelaka baoi bakiso alosangelaka, o la inyo lokuta yakelaka. 5 Aye Nkumu atondodyi betema

bendiso nda diyota dinda diphepha dina Nkumundjeyi o la nda itshidi inda Kilisito.

6 Bain'anami, toloonda nda dina ina Nkumu endiso Yeso Kilisito mbo, Lomamwaka la wina boninyo bouma ondoyadi la lonkala la aphoyeli baoi akinyo wambaka m'ele isho. 7 Nd'itshina ina inyo menge yeyaka mbo, Diyadi la inyo ditokola, djoi inda isho totokende la lonkala nd'atei aninyo; 8 totole toma tonda bonto olala; ayi isho toloka enduku, tolona elu, tokambaki o la botsho o la iyani mbo, Totoyali bodito ele bomodi boninyo; 9 apha one mbo, Tophoyadi la mpamba enda dikela shiko, aye isho olangaki diyala eshile ele inyo ina inyo ditokola. 10 Akiso wulamaka la inyo, tolosangela shiko ayisho, Nkina bonto apholango dikamba bolimo, andi aloleki. 11 Sheko tomboka bosako mbo, Bamodi nd'atei aninyo bakenda la bosekwa, basi emponye baphokambi bolimo, basi ephasa nda baoi bana ankanyi. 12 Ko etambene isho tokekemya baiko la toloonda baiko nda djoi dina Nkumu Yeso Kilisito mbo, Bakambi bolimo la pholee, baleki toma tondiyo menge. 13 Aye inyo, bain'anami, lotolemvwaki nda dikela baoi band'olotshi. 14 Nkina bonto aphimedye djoi indiso dikiso alokotelaka nda bonkanda, lephwaka bonto boiko olotshi, loto, lotongolaki la andi ina andi yoka nsonyi; 15 ko lotoyalaki bantonyi banandi, ko loolakaka shenda bonto la bona nyango.

16 Aye, Nkumu enda baoi banda wee andi o mele alokayi wee betsho beuma nda baoi baninyo bauma. Nkumu ayali la inyo bya. 17 Ndolokotela bosasako one la dikata inami, emi Paulo; bok'oyadi ilimbitelo nda bonkanda bonami bouma; nshokota nko shiko. 18 Diyota dinda diphepha ina Nkumu endiso Yeso Kilisito diyali la inyo bya.